

25. oktober

UKA2018/164

**Naalackersuisut kingusinnerpaamik UKA2019-imut inatsisinik atuuttunik allanngortitsinissaq pillugu siunnersuummik saqqummiussinissaat, taamaaliornikkut eqqumiitsuliornermut aningaasaateqarfimmik pilersitsinikkut eqqumiitsuliornermut aningaasaliissutinik tamanik agguaassinermi attuumassuteqannginnissamik pilersitsinissaq periarfissinneqarsinnaanissaat ilanngullugu Inatsisartuni aalajangiiffigisassatut siunnersuut.**

Inuit Ataqaatigiit sinnerlugit Inatsisartuni ilaasortap Peter Olsen siunnersuutaa Siumumiik imaattumik oqaaseqarfigissavarput.

Siullermik nuannaarutigaarput qinigaaffik kingulleq Siumut siuttooqataatillugu eqqumiitsuliornerup silarsuaani inatsisitigut siuarsaaqataasimagatta, soorlu Kultooreqarnermut Naalackersuisup oqaatigisaatut kultuuri siuarsarniarlugu suliat assigiinngitsut peqataaffigisatsinnik aallartisarneqarnikuupput.

Siunnersuuteqartup anguniagaa tassaavoq inatsisinik atuuttunik allanngortitsinissaq tassani siunertaralugu eqqumiitsuliornermik aningaasaateqarfimmik siunissami pilersitsisinnaanissaq. Siumumi imatut paasivarput maanna eqqumiitsuliornermik aningaasaateqarfimmik pilersitsinngikkaluarluni inatsisitigut periarfissiinissaq siornatigut nassuiaatip ersersimmagu tamanna pisariaqartoq.

Siumumi Naalackersuisut tunngavilersuutaat paasilluarparput tassa maannakkoqqissaaq aningaasaateqarfimmik pilersitsinissamut aningaasanik immikkoortitaqanngitsugut kisiannili aningaasanik agguaassisarneq eqaalisarniarlugu suliniuteqarneq ingerlsoq.

Siunnersuut atuareerlugu Naalackersuisullu akissuteqaataat atuareerlugit isumaqarpugut aningaasaateqarfimmik pilersitsisinnaanermut inatsimmik pilersitsinissaq kiisalu massakkoqqissaaq aningaasaateqarfimmik pilersitsinissamik Naalackersuisut nangaanerat immikkoortinneqartariaqartut. Taamatut tunngavilersuuteqarluta siunnersuut ataatsimiititaliamut ingerlateqqinneqarnissaa innersuupparput peqqissaartumillu nalilersorneqarnissaa innersuussutigalugu.

Oqallilluarisi

Doris J. Jensen, Siumut